

د. وهبه البوهي

# همسات عابرة

أشعار

صدرت الطبعة الأولى في أكتوبر 2018

## بطاقة الكتاب

عنوان المؤلف : همسات عابرة  
المؤلف : د. وهبه البوهي  
التصنيف : أشعار  
رقم الإيداع : 2018-19189  
الترقيم الدولي : 978-977-6656-98-7  
عدد الصفحات : 114 صفحة  
رقم الإصدار الداخلي: 277  
تاريخ الإصدار الداخلي: الطبعة الأولى أكتوبر 2018

جميع حقوق الطبع والنشر محفوظة للشاعر، ولا يحق لأي دار نشر  
طبع ونشر وتوزيع الكتاب الا بموافقة كتابية وموثقة من الشاعر

### دار النيل والفرات للنشر والتوزيع

ثورة مصرية تشرق إبداعاً على الوطن العربي

رئيس مجلس الإدارة

## ناجى عبد المنعم



دار  
النيل والفرات  
للنشر والتوزيع  
أسسها الشاعر ناجى عبد المنعم  
حتم

رخصة مزاولة مهنة: 58365 - سجل تجاري: - 13242 / 2017 - بطاقة ضريبية: 35-01-572  
عضو عامل باتحاد الناشرين المصريين رقم 941 لسنة 2018  
هاتف: 01011256943 - 01116202218 - 01202541192 تليفاكس: 020554372901  
alnilwaalfourat@gmail.com alnilwaalfourat  
المقر الرئيسي: ج.م.ع. محافظة الشرقية - العاشر من رمضان - مجاورة 13 - أمام سنتر الد13 - عقار 304

## الإهداء

إلي أهلي وأخواتي وأصدقائي وزملائي الذين يهوون شعر  
العامية خالص تحياتي وتقديري

من آلام عشتها  
وأحلام حلمتها  
وآمال نلتها  
ولد هذا الديوان  
ياريت تسمعولي  
ولو عجبكم تقولولي  
وتشجعوني كمان  
أنا واحد منكم  
وشاكر فضلكم  
وف قلبه لكم  
حب وحنان

د. وهبه البوهي

# الطب دا مهنتي والشعر كمان كاري

الطب دا مهنتي والشعر كمان كاري  
أدخل علي صفحتي واستمتع بأشعاري  
هتلاقي كلام دهب متفسر ومتداري  
هتقدر من غير تعب تقرا أفكار

الطب دا مهنتي  
وف الشعر أنا لعيب  
باقول كلام موزون  
من غير نشاذ ولا عيب  
سهل وبسيط يفهمه  
كل عدو وحبیب

كل كلامي درر  
وف كل وقت له عازه  
ساعة المرض تلقاه  
دوامتعبی ف ازازه  
وساعة الحظ وياه  
یوصف فیها بلذاده

# أنا ساحر

أنا ساحر وأبن ناس  
وسحر شعري جميل  
لا كنت يوم هجاص  
ولا أعرف التطبيل  
شعري فيه إحساس  
ينقد بدون تهويل  
وحروفه كالألماس  
عليها بريق ودليل  
بتنور كل طريق  
والناس تقول يا ليل  
كلامك كله جميل  
يتغني كالمواويل

# صعب جدا

صعب جدا إني أقول  
كلام كبير بدون مشاعر  
كل كلمة طالعة مني  
تحس فيها نبض شاعر  
ساعة أكون فيها ناقد  
وساعة تقول عليا ساحر  
يسحر الحروف أغاني  
وبيها يحرك المشاعر  
عصفور يغرد في البيوت  
ف الشوارع ع العمائر  
ينور الضلمة السكوت  
ويصحي ف الناس الضماير  
المهم عجبك كلامي؟  
كلامي حلو ولا واعر؟

# صباح التفاؤل

لازم بعد الضلمة نور  
وفجر بعد الليل يدور  
ومهما طال الليل بطوله  
والقمر نور سماه  
لازم ييجي نهار يقوله  
شمسي جايبة معاه ضياه

# أنا روح عايشه ف إنسان

أنا روح عايشة ف انسان  
من حقي العيشه ف أمان  
طول عمري عاشق أفراح  
ولا عمري بحب الأحزان  
روحي بتحب التفاريح  
وما احبش انكد ع الغير  
مسامح وقلبي صريح  
وباسعي دايماف الخير  
روحي شفافه وعميقه  
وربي عالم تفاصيلها  
زهرة ف بستان و حديقته  
كل الفراشات بتجيلها  
أنا فله شمعته منوره  
بتنور ف ظلام الليل  
وعسلي حته سكره  
بلسم بيداي العليل  
وبتغزل ف خيوط الشمس



وتغني وتقول مواويل  
مش حاقـد علي حد وقنوع  
لو حتي هاموت م الجوع  
وكافي خيري واشراري  
ولا مره ركبت الممنوع  
وكتير ناس زي حالاتي  
طبيب ومهندس وساعاتي  
فلاح برضه وميكانيكي  
بيكدوا ف الدنيا يوماتي  
راضيين بحالهم وأحوالهم  
لا طالبه منصب ولا جاه  
بيصحوا بدري لاشغالهم  
وتكالهم بس علي الله  
ولا أحب الهيصه والزيطه  
ولا أحب الشو والتعريس  
وماشي لازق ف الحيطه  
وف حالي ما حب التهلـيس  
وتغور كل التعريفه  
إلي تيجي من حبة تهجـيص  
أنا روح عايشه ف إنسان  
من حقي أعيش ف أمان

# قلمي سيف

قلمي سيف ع الحرامي  
واللي هو مش نضيف  
واللي واكل قوت ولادي  
وعامل فيها واد شريف  
وع إللي فاسد واللي حاقد  
واللي أصله مش عفيف  
واللي عايش سحت دايم  
وم الغلابه يسرق رغيف  
قلمي سيف ع الحرامي  
واللي يظلم يوم ضعيف

## دمنهور بلدي

دمنهور بلدي. مدينة النور  
من أيام. الإله حتحور  
دمنهور بلدي. بلد الحضارة  
منذ الفراعنة واخدة الإمارة  
لبعض رجالها هاندي إشارة  
أسمع مني وشوف الأمانة  
منها تواضروس وقبله كيرلس  
وعبد الوهاب المسيري فكره يدرس  
عبد المنعم الصاوي منها وزير  
علي الثقافة فضله كتير  
توفيق الحكيم وأبو غزالة  
ومحمد عبدة والشيخ شلتوت  
بلدي منها كتير رجاله  
شيوخ للأزهر ليهم صوت  
وسليم البشري كان معاهم  
والشيخ الدمنهوري كمان وياهم  
محمد الغزالي دا عالم دين  
كل كتبه علم ودين فيها سماحة وفيها دروس  
كله مفسر بالبراهين  
والتوبة دا مسجد فيها قديم

أعرق مسجد فيها يا ناس  
يكفينا شرفنا عليها نقيم  
إللي بناه عمرو بن العاص  
وجيه أباطة جالها محافظ  
عمل فيها حاجات وحاجات  
مستشفى ونادي ومعاه إستاذ  
ليها لحد اليوم علامات  
وعمل فرقة فنون شعبية  
صيتها عدي كتير قارات  
امتد نشاطها برة وجوة  
واحيت لينا كتير حفلات  
ومنها زويل دا عالم كيميا  
وده بعلومه غير دنيا  
وخذ من نوبل أعلي شهادة  
رفعت راسنا في كل الدنيا  
وأنشأ لينا جامعة كبيرة  
وخلي زمانا بالقيمتو ثانية  
وأبن ايتاي البارود ياجماعة  
مكان ما يمشي تمشي إشاعة  
حير كل أعدائه معاه  
قصص نضاله حكاوي اذاعه  
أدهم الشرقاوي كلنا عارفينه  
قصص كفاحه وسام علي جبينه

قاوم الانجليز وعرف لغاهم  
يوناني إيطالي فرنسي لقاهم  
واتكلم بكل اللغات معاهم  
من حب السادات الشديد فيه  
كان واخذه أكبر مثال ليه  
مات في عز شبابه الولد  
قتله إلهي خان من أهل البلد  
ومن أهل الفن منها رجال  
عبد العزيز مخيون والجندي يا خال  
ليهم بصمة في كل مجال  
سينما ومسرح قالوا وقال  
ومنورنا الليله أهوه  
فنه رفيع تحكيه لاجيال  
أشهد يا تاريخ يا الله وعيد  
أهل بلدي وأهل رشيد  
ضربوا فريزر ضربه قويه  
وكان النصر دا يوم عيد  
وف الختام نقول يا سلام  
مهما قولت ف بلدي كلام  
مش هاوفي حق رجالها  
ولا شيوخها من الأعلام  
واللي فاضلي أنا وأنتم  
نضرب ليهم ألف سلام

# فاكر

إلى زميل الدراسة  
فاكر لما كنت جنبي  
ف تختة واحده وفصل واحد  
وكنا نشتم بعض لما  
يسبق فينا أي واحد  
كنت مرة تكون سابقتي  
ومرة تانية أسبق بواحد  
واختلفنا مع بعض ياما  
بس كنا علي قلب واحد  
وحتي لما كبرنا برضة  
ظل الحب بينا واحد  
كنا نقسم عيش بأيدينا  
وكان يجمعنا صحن واحد  
ولما باعدت الأيام ما بينا  
لقينا تاني طريقنا واحد  
وما نسيناش العشرة ابدأ  
واللي ينسي يبقي جاحد  
وده لأن أنا وإنت  
ولاد أصول والأصل واحد

# صعبة الدنيا

حببت افهمك يا دنيا  
لقيت فهمك كثير صعب  
ساعات الهنا ثانية  
وساعاتك كثير كرب  
راضي بنصيبى أنا  
وطالب رضا ربنا  
ووقت اللقا بيه  
شفاعة المرسل لنا  
ومعها السماح والقرب

## كنت زمان

كنت زمان كنت عنتر  
وكنت فارس ف الميدان  
النهاردة لو عجبت عيلة  
ساعتها يمكن أخذ نيشان  
كنت زمان شعري أصفر  
والعيون خضرة جميلة  
والنهاردة شعري أبيض  
وصحتي صارت عليلة  
كنت زمان عاشق قمر  
وقمري كان بدر الزمان  
مر الزمان وطار القمر  
وبطل ينور زي زمان  
ياريته يرجع عهد زمان  
ويرجلي عشق زمان  
كنت زمان عندي سنان  
وكنت أشوف بعينيا  
وكنت أجري كالحصان  
واسبق زمايلي كلك ف ثانية  
وكانت وداني حتي تسمع  
كل همس حواليا



والنهاردة تلاقيني ماشي  
بالعكاز في إيديا  
والناس لأجل أسمع  
لازم تعلي صوتها عليا  
ومن غير النضارات  
يدوبك أشوف شوية  
نفسي أرجع زي زمان  
طفل بيجري في الميدان  
يقول لبابا ولا لماما  
كلمة فيها شوق وحنان  
ولما يقابل مرة أبوه  
يجري يأخذه بالأحضان  
نفسي أرجع زي زمان  
نفسي ألاقي الخير ألوان  
نفسي الكل يعيش في أمان  
نفسي سهرة مع الخلان  
نفسي الخير يعم علينا  
نفسي الفرحة تملأ عينينا  
نفسي اللمة مع الجيران  
لكن ياعيني ع إلي كان  
أنا دلوقتي بقيت مسئول  
عندي عيله وولاد بتقول  
عايزين بابا كمان وكمان

ياريته يرجع عهد زمان  
مهما قولت ومهما حكيت  
عن شقبا كثير ف الغيط  
وبعد رجوعي آخر الليل  
بمعاناتي ومهما قاسيت  
مفيش مرة حد يقول  
كلمة شكر لصاحب البيت  
هيا دي راية وبنسلمها  
ياريت تحفظها يابني ياريت  
ياريت تحفظها يابني ياريت

## كنتى فىن ؟!

كنتى فىن يادنيا فىن  
لما قلبى كان حصان  
بعدت علىا وضحكت علىا  
وقالت راحت أيام زمان  
كنت فارس وأي فارس  
والحياة مالهاش أمان  
لكن قيمتك دلوقتي عالية  
ويشار إلك بالبنان  
إنت أعطيت كتير  
ومازلت تعطي مهما كان  
والولاد شايلين جميلك  
هانرده لىك حب وحنان

# يادنيا خفي الوجع

يادنيا خفي الوجع  
وكفياكي مرار  
دا احنا شوفنا البدع  
من زمن غدار

يادنيا خفي الوجع  
دا الوجع وجعين  
صبرت كثير ع الوجع  
وأجيب له صبر منين

ياموزعين الصبر  
أمال نصيبي فين  
أنا شربت المر  
ومحتاج كمان صبرين

لا قادر أصبر خلاص  
والصبر فاض بيا  
من تقل همي ياناس  
رميته ف الميه  
وناجيت رب الناس  
ورفعت له ايديا

لأجل يزول همي  
ويخف عني شويه  
وهو دا أمني  
من ربي ف الدنيا  
هاتوكل ع لله خلاص  
هو كفيل بيا  
رميت همومي عليه  
لاقيتها منسيه

# صورة طفل حزين



شايـف الدمعه الحزينه  
نازله من ولد ابن عمي  
وكل ولاد المدينه  
مش حاسه همي وغمي  
اشتكي لرب الخالق  
يابني واتوكل عليه  
ربك هو إـلـي رازق  
وألجأ دايما إليه  
ما تطلبش من عبد نعمه  
دا هو زيه زيـك  
ربك يرزقك ببسمه  
تسعد القلب إـلـي زيـك  
ما تطلبش من عبد زيـك  
وامسح دمعك يواد  
دا هو زيه زيـك  
واطلب من رب العباد

# باحلم

باحلم أعيش مرتاح  
زي كل الناس  
اصحي كل صباح  
حواليا أهل وناس  
اضمهم بعيوني  
وبقلبهم يرعوني  
وأحس إنني ف أسرة  
ليها عماد وأساس  
ولما تمر أيام  
وأكبر كده بسلام  
أكون لكل أحبابي  
زي القمر وناس

# معانا طيب منفوخ

معانا طيب منفوخ  
ع الفاضي وع المليان  
مغرور ف نفسه وفاكر  
إنه أحسن الشبان  
ماشي يتمخطر كأنه  
فارس بني حمدان  
لا حد طايقه ولا قابله  
سليم حتي ولا عيان  
لسانه أصلا زفر  
عضاض كما التعبان  
يغور من صحبتي  
لو شوال دهب مليان  
دا البعد عنه غنيمه  
وصاحبه اكيد خسران  
دا محبة العبد يابني  
من محبة الرحمن  
لوبعدت عنه ياصاحبي  
أكيد هاكون كسبان



## إو عي رد الجميل

أو عي تزعل أمك وابوك  
ولا تغضب أختك واخوك  
ربك قال ف قرآنه لنا  
لازم يكونوا ف قلوبنا وعينينا  
ارحمهم كما ربياني صغيرا  
واعطف عليهم عطا كثيرا  
لما كنت صغير ياما شالوك  
وبقلوبهم وعينهم ياما رعوك  
وخلوا بالهم دائما عليك  
واتمنوا في أحلي صورة يشوفوك  
وانت كبير ترد الجميل  
وتحفظ ودادهم وتكون أصيل  
تكسب رضاهم تخليك معاهم  
بكل المعانى حلو وجميل  
أبوك كان بيدعي ليك في صلاته  
تكبر وتصبح زهرة حياته  
ويسهر ليالي يناجي لربه

يحفظ كل ولاده وبناته  
ولما يمرض ويصبح حزين  
عنك يخفي عذابه واهاته  
حس ياواد خليك رحيم  
بكرة هاتصبح مثله ف ذاته  
وولادك يردوا ليك الجميل  
إلي عملته لأبوك في حياة  
أوعي تزعل أمك وأبوك

# معقولة

معقولة الأب يتجنن  
ويسوق جنانه علينا  
معقول الدم يصبح ميه  
والأب يدبح فينا  
معقولة ايدين بتحن  
تيجي في يوم و تأدينا  
معقولة مش معقولة  
حتي لو شافت عينينا  
قبل ما ننوي شر  
كان لازم ننسي اسامينا  
ياللي الشيطان راكبك  
علي فين راح تودينا  
ولذك زمانه ف الجنة  
وانت ولا تصعب علينا  
يابوي ما كان العشم  
تعمل كده فينا  
ترميناه ف المي

شئ ما يسويه اعادينا  
زهر السنابل قطفته  
ومن اقرب الناس لينا  
لا سييته يثمر ليك  
ولا يفرح أهالينا  
بدل ما نطرح خير  
الغدر كان لينا

كتبت في الأب الذي ألقى أولاده في البحر

# الأصل مش بالمال

كثير تلاقي غني  
ما عنده أصل واصل  
وكثير تلاقي فقير  
يعطيك ف الأصل فاصل  
الأصل بالأخلاق  
لو ماتت الأخلاق  
هاتموت كل الفواصل

# بطل تضحك علي نفسك

بطل تضحك علي نفسك  
وتعمل نفسك فرحان  
شكل الفرحان من بره  
وقلبه مليان أحزان  
ولا إنت بتضحك من وجعك  
وفاكر وجعك ما يبان  
فضفض عن نفسك مره  
وقولي مالك زعلان  
عبر عن حزنك مره  
وبطل وانسي الكتمان  
ولا انت كتوم من طبعك  
خايف لتفرح شمتان  
ولا بتعند مع حزنك  
وشايل م الهم ألوان  
ودموك مش راضية تنزل  
محبوسه خلف الجدران  
دا الهم يدمر شرايينك

ورافع للضغط كمان  
ويعلي السكر ف وريدك  
وليلك ونهارك زهقان  
لا تيأس ف حياتك مره  
وتأثر على قلبك أحزان  
سيبك م الهم يا أخينا  
دا الدنيا ساعه وبتعدي  
وإحنا راكبين ف سفينه  
سرعتها عاليه ما بتهدي  
والموجه لو مره عاليه  
بفضله سفينتك هاتعدي  
سيبك م الدنيا وزعابيبها  
وعيشها بالطول والعرض  
ما دام بتادي إلكي عليك  
وتصلي السنه والفرض  
فضفضلي إنت يا حبيبي  
وافتحلي قلبك بحنان  
هتلاقي الدنيا بقت حلوه  
وهمك راح ف خبر كان  
ونعيشوا أيامنا بغنوه  
وهاتبقي أسعد إنسان  
كبر اللهم وانساه  
دا الدنيا أيامها قصيره

اتوكل بس ع الله  
هاتريح قلبك م الحيره  
قوم صلي لربك وادعيله  
هايروح الهم وتنساه  
ومشاكلك لو حتي كبيره  
هاتعدي بفضل الله  
وذنوبك لو حتي كثيره  
أستغفر يغفرها الله  
أستغفر يغفرها الله



# وزيرة الصحة



وزيرة الصحة بتاعتنا  
كفايه علينا ابتسامتها  
اول ما تشوف حضرتها  
هاتقرا عليك النشيد  
لو كنت مريض بتعاني  
م الألم تصرخ حياني  
هايروح الألم ف ثواني  
وتلاقي صحتك حديد  
والكل يسمع كلامها  
دا علامنا مش زي علامها  
وبعد ما تسمع سلامها  
تطبق الطب الجديد  
والكل يقول يا خواتي  
لكل مريض ف حياتي  
رجعلي تاني بيهاتي  
أسف نسيت النشيد

# الدوا نشيد تهديه

جالى مريض  
جالى مريض م الألم  
بيصرخ يقول أحبيه  
وحالته كانت عدم  
مش شايف خلاص بعينيه  
قالولي إن القسم  
شفا للألم فيه  
قولت اقول القسم  
وأسمع النشيد ليه  
رجعت لقيته مات  
وأهله بيصوتوا عليه  
منك لله يا وزيره  
ياوزيره الدوا ناقص  
والمريض جاي لنا خالص  
لو يسمع صوت بلاده  
هايطلع من هدمه مالمص  
يا وزيره الدوا غالي  
ومريض جاي بيلالي  
وانتي جاية تقولي  
غنوله نشيد بلادي

## بحر الوجع

مریت علی بحر الوجع  
لقت نفسی غرقان فیہ  
صرخت من کثر الوجع  
الشفافین أراضیہ  
قالوا روح للطیب  
لقت الطیب حار فیہ  
یا للی عندک دوا  
فین الدوا الاقیہ  
قالوا شوف عطار  
یمکن تلاقی فیہ  
یعطیک شویة صبر  
والصبر إیہ یداویہ  
یارب إنت بحکمتک  
ساعد مریض واشفیہ  
وداوی لمریض علتہ  
إحتار الأطبا فیہ  
صابر علی محنتک  
وإنت بایدیک تداویہ

## القسم الجديد

أحلف بسماها وبترابها  
لا هالم الجيرة وشبابها  
واخلي الدنيا تتفرج  
ع اللي نهبها واللي خربها

وهاغني بلادي يابلادي  
والكل يردد وينادي  
إلي مش عاجبه المستشفى  
يغور من وشي الساعادي  
والوكسة إلي إحنا عايشينها  
هايقولوا عليها شئ عادي  
والدوا أهو ناقص وكفايه  
إني أغني لبلادي  
واللي ما يخفش عندنا  
يتحول قسم الاعادي  
أحلف بسماها وبترابها

## عتاب النذل

عتاب النذل اجتنابه  
ولا تحكي مع صاحبه  
صاحبه هايكونوا مين؟  
غير كلاب من كلابه

لو مرة ترد عليه  
يحس بقيمة شبابه  
وتجاهلك إنت ليه  
هيزيد من عذابه

النذل ممكن يدوسك  
ويوصل لأعلي المراتب  
ويبيعك ويقبض فلوسك  
ويحقق أعلي المكاسب

ويكون أفضل يا صاحبي  
إنك تسببه ف حاله  
وتصاحب دايمًا أصيل  
وتحافظ علي وصاله

# الصاحب الزين

الصاحب الزين قاعدته عال العال  
لا هيا تتقدر بالماس ولا بالمال  
وقت الشدايد تلقاه دوام جنبك  
ويحفظ سريرتك ويخلي حالك عال

الصاحب الزين قاعدته موزونه  
يحفظ لسانه وكرامته مصونه  
مهما يجور الزمن الأصل فيه باين  
تلقاه ساعة المحن ايده حنونه

# الجوع كافر

قالوا الجوع كافر  
وما قالوا أمتي يتوب  
ومن كفره خلي الناس  
الغالب يبات مغلوب  
ويذل رقاب للناس  
ويكشف ليها عيوب  
والحره تبات صايمه  
ولا تعري يوم عرقوب  
ياللي نشرتوا الجوع  
قولوا أمتي يتوب  
ويحل عن سما شعبي  
ونضربه بمركوب

# حبسوك يا شط اسكندرية

حبسوك يا شط اسكندرية  
وحجبوك بعيد عن عينا  
دلوقتي لا قادر أشوفك  
ولا أحط أيدي ف الميه  
حبسوك يا شط اسكندرية  
هواك العليل فقدته  
وموجك اللي كان لي غية  
ورملك إلهي بنيت عليه  
خيال وأحلام وردية  
حبسوك حبسوك  
حبسوك يا شط اسكندرية  
الهوا قالوا نبيعوه  
والميه قالوا امنعوه  
مسموح بس للي يدفع  
ومعاه ألف ومية  
منعوه منعوه منعوه  
وصار غالي عليا  
الشمس عليكي راحت



والقمر ما باينش ليا  
وزوارك زارت ما شافت  
شطك يا اسكندريه  
حبسوك حبسوك حبسوك  
يا شط إسكندرية



# حكاية علاء

الواد علاء إلي عندنا  
شد نفس طويل  
م السيجارة إلي شاحتها  
من عمه إسماعيل  
وهو ماسك برطمان  
مليان شاي ثقيل  
سألني يا دكتور  
يعني إيه زنجبيل  
ويعني إيه كركديه  
إلي بتوصفوه للعليل  
وسرح شوية وقال  
بعد وقت مش طويل  
وقالي يا دكتور  
علاوة يعني إيه؟  
هيا أكل ولا شرب  
ولا لبس ولا إيه؟  
وقولي يا دكتور  
هاتديني منها إيه؟

عارف يا دكتور  
لو عطتني ميت جنيه  
هاتشوف الواد علاء  
بكرة هاعمل إيه  
وعطيت الواد علاء  
من جيبى ميت جنيه  
وسألته يا علاء  
قولي هاتعمل إيه؟  
شد نفس طويل  
م السجارة إالى ف ايديه  
وخذ شفتين  
م الكوبابه إالى ف ايديه  
وقال هاغير القميص  
إالى عندي من سنين  
وارمي البنطلون  
إالى شاحته من حسين  
والبس جزمة كوتشي  
وارمي الشبشبين  
وأجيب نضارة شمس  
تحمي العينين  
وأجيب بطيخة حمرا  
ومعاها بطتين  
وبعد ليلة حمرا

اعشي العيلين  
وقام من ع البلاط  
وفرد رجله  
صحيح يادكتور  
يورو يعني إيه؟  
والاسترليني والدولار  
هما أحسن م الجنيه؟  
فطمني يا دكتور  
ونا أقولك يابيه  
وقولي يا دكتور  
لو عندك ضمير  
ليه الخبز ليه  
عليه كلام كتير  
هي الحكومة هاتمنعه  
ولا هاتوزعه ع الفقير  
والجاتوه هايوزعوه  
عشان الخير كتير  
والأكل لحد عندي  
هايجيلي ع السرير  
وناوين يلبوسونا  
بدال الخيش حرير  
الاهي يادكتور  
أشوفك يوم وزير

ألا قولي يادكتور  
مين هو الغني  
ومين هو الفقير  
قولتله يا علاء  
الله هو الغني  
وربك كبير

# حوار النعجة والخروف

حوار النعجة والخروف  
النعجة قالت للخروف  
إياك تقرب مني  
رد الخروف وقال  
وانت ليه تبعد عني  
عشان لك سحنة جميلة  
وماشي تتمخطر وبتغني  
ولا ولقت علي غيري  
ياللي طبعك مجنني  
هانت العشرة عليك  
وجالك يوم تزعلني  
ساييني ورايح فين  
مش هتلاقي أحسن مني  
مسيرك تجيلي ف يوم  
وساعتها هاردك عني  
قالت النعجة للخروف  
يابو القرون الطويله  
إن كنت إنت أصيل  
أنا برضك اصيله  
من بيت عز وكرم

فيه المرعي واسعة وجميلة  
قضيت فيه أحلي صبايا  
واحلي أيام الطفولة  
لازم ياسبعي تجري ورايا  
عشان أكون لك أنثي وخليله  
رد الخروف وقال  
قضيت سنين عمري أجري وراك  
ادلع واطبطب  
واحفظ وداذك وادوب في هواك  
وانت تجافيني وتقسي عليا  
إيه آخرتها معاك  
إيه إلهي اتغير عليا  
أنا كنت فاكرك ملاك  
ردت النعجة وقالت  
تعالى معايا لمكان خالي  
لا يشوفنا انس ولا جن  
ولا حد من عزالي  
ضحك الخروف وقال  
عقبالكم وهنيالي  
هاقضي ليله سعيدة  
وأصبح ف مزاج عالي  
واغني جددت حبك ليه  
للنعجة وعزالي

## عجبي

اللهم لا اعتراض  
تعلمت من بلدي  
إن سنة الحياة  
العدل فيها ماشي  
عند كل القضاء  
إنها تسجن البرئ  
وتبرأ الجناه  
والشيخ المعمم  
تارك للصلاة  
ومش طابع لربه  
صبحه أو مساءه  
وبينافق الحاكم  
ويفتي علي هواه  
والعالم الكبير  
مش لاقى دواه  
وهو وعياله



بیسجد لآله  
ییجی رزق یومه  
ورزقه ما کفاه  
والی تهز وسطها  
بتغنی الله  
ومن کتر الفلوس  
سلطان وجاه  
و سألت الکبار  
وأصحاب الجاه  
قالوا ما تسألش  
دی سنة الحیاة  
اللهم لا اعتراض  
علی سنة الحیاة  
ولا عمري هاشتکی  
ولا حتی أقول آه  
ولا حتی أقول آه  
وعجبی

## مذكرات سكران

لا تقدر لقدمك قبل الخطو موضعها  
وامشي ف الدنيا كما السكران  
ولا تأبه لصروف الزمان فإنما  
يمضي الزمان دون هوي الإنسان  
فاغنم من حياتك كل ربيعها  
فليس بعد العمر عمرا ثاني  
واغنم من الدنيا كل متاعها  
فإن الحياة دقائق وثواني  
وادع لربك أن يمنحك دائما  
من النساء اكثرهن رقة وجنان  
ولو صادفت يوما أنثي جميلة  
خذها مباشره بلا تردد وتواني  
واسكر من رحيق الحب ساعة  
فساعة الحظ لا تعوض من ثاني  
وأدعي لربك أن تكون جميلة  
تهوي الفراش ومتعة الأبدان  
ولا تنكد عليك حياتك كلها  
ولكن تعيش في صمت وأمان

ولا تدع لأحد يحاسبك كلما  
أقدمت علي فعل من عمل الشيطان  
فالله وحده هو الذي يحاسبك  
وهو الذي عنده جنة ونيران  
وهو الذي يعلم من التقي بيننا؟  
وهو الذي يعلم من الشيطان  
والله أرسله ليغوي بني البشر  
أيرضيك أن يظل عاطلا كسلان  
الشيطان يسكن عقلك دائما  
يزين لك محاسن الكفر والعصيان  
فلا تخشي الشيطان يوما فربما  
شيطان الإنس أقوى من الشيطان  
ولا تستقوي علي ضعيف فربما  
تتساوي في النار مع ذو عز وسلطان  
صديقي لا تسمع لي نصيحة فإنما  
هذا حلم أو كابوسا منه أعاني  
والله الهمك الفجور مع التقي  
فاذا اخترت الفجور تبوء بالخسران  
وإن أخذت ألتقي وسلكت كل دروبه  
تفوز بفضل الله بجنة الرحمن  
فلا تدع الشيطان يغويك دائما  
واجعل من القرآن دستورا وبيان  
وحافظ على صلاتك دائما فإنها

تنجيك وصلة بين العبد والرحمن  
فإن رضىته أعطاك من واسع فضله  
فوق ما ترجو دون أن تشقى وتعاني  
ولا تخشى الموت فإن الموت مقدر  
سوف يأتي إليك بلا استئذان  
فلا خير بعد الموت سوف تلقاه  
سوي ما قدمت من بر وإحسان  
فأنت والدنيا وكل متاعها  
ستصبحون قريبا بإذنه شيئا فاني

## غلطان إلهي يحب زيي

بعد المديح ف المكمل  
أحمد أبو درب سالك  
إلهي يعشق زيي ويكمل  
يورد نفسه المهالك  
ابعد يا حب عني  
خليني ف الدنيا سالك  
مش ناقص تزودلي همي  
ولا ناقص يا حب معارك  
غلطان إلهي يهوي مره  
ويشجع نادي الزمالك  
يجيله الضغط والسكر  
ومصيره ف الدنيا هالك  
مش ناوي أحب ثاني  
وأشجع أهلي وزمالك  
هعيش حياتي حره  
ويانفسي كوني ف حالك  
من قلبي ناوي أقول  
يا عيني عليك يازمالك

# أنا جاي أتأهل يا خوانا

أنا جاي اتأهل يا خوانا  
واودع عيشة العزوبيه  
ولو إني بعافيه شويه  
ومش قادر اصلب رجليا  
وها ركب طقم سنان  
لاجل اكل بيه الطعميه  
لكن جيوبي عمرانه  
ومعايا كتير م النقديه  
وجاي من بلدي متعشم  
أتجوز مزه مصريه  
نفسي الحقتي يومين  
وأدخل عش الزوجيه  
وأخلف منك ولدين  
يكونوا ليا ذريه  
لكني ما حبش أسهر  
وبحب أنام م العصريه

وحياتي م البيت للجامع  
ويوماتي أصلي الفجريه  
ولما توافقي يا عروسه  
هاكتبك فدان ف المنوفيه



# حكاية وطن

لما بنينا السد العالي  
فضلنا نغني لوطني الغالي  
وقولنا هانعلي ونبني المجد  
وكات آمانينا ما لهاش حد  
جم أعادينا اتربصوا بينا  
وزرعوا لينا مليون سد  
وكان الأمر لساه بدر  
وجانا الفجر وياه غدر  
جانا الغدر بايديه تتمد  
جات النكسه ضربه قويه  
ومن تدبير الصهيونيه  
كل إلهي حلمناه اتهد  
وبعزم الشعب المصري لوحده  
قرر يبني دعائم مجده  
ويرجع يبني بلده بجد  
ويمسح كل دموع ع الخد  
وف أكتوبر كانت ثوره  
ثوره ف كل الدنيا تمد



وكان النصر إلهي حصدناه  
ورجعت سينا لأرض المجد  
ورسموا البسمه علي شفايفنا  
لما جنودنا عبروا السد  
وعدنا شعب بيحلم تاني  
وكات أحلامنا مالهاش عد  
ودم أولادنا ف تراب سينا  
خلا تر ابها غالي علينا  
مش هانفرط فيها بشبر  
مهما زرعوا مليون سد  
لكن لاستعمار مش راضي  
عايز بلدي تعود للماضي  
قرر يقتل كل أحلامنا  
لما يحطم شعب بلادي  
وظل الغدر ف جزر ومد  
زرعوا الفتنة بين أهالينا  
خلوا الدين يفرق فينا  
شربنا الطعم إحنا بأيدينا  
وجالنا يوم نقتل بعضينا  
أصل ياناس ما حناش فاهمين  
قيمة الوحده وأصل الدين  
لو اتوحدنا وف إيد واحده  
مش هايهمنا أيها حد

ياما فرحنا وياما غنيا  
لكل أمل إحنا عايزينوا  
تمر لأيام وتعدي علينا  
حتي الغنا ما حناش طايلينوا  
شعب بلادي ياعيني عليه  
كل الدنيا ليه حاسدينوا  
عايزين ياخدوا منا اللقمة  
وبفرقتنا إحنا مساعدينوا  
فين أيامك يا حطيين  
فين أيام صلاح الدين  
بكره إن شاء الله راجعين  
ونقطع كل ايدين تتمد  
وساعتها الشعب بالملايين  
يقدر لعين الشمس يسد  
يقدر لعين الشمس يسد

# وطني حبيبي

وطني حبيبي  
الوطن الأكبر  
أحمد شفيق كامل  
محمد عبد الوهاب  
وهبه البوهي  
مع إحترامي للأغنية  
وطني حبيبي الوطن الأكبر  
يوم ورا يوم امجاده بتصغر  
وانكساراته وانهزاماته  
يوم ورا يوم بتزيد وبتكثر  
وطني  
بيعت كرامتك للخائنين  
بيعت شهامتك للحاقدين  
حتي اخواتك ليهم تغدر  
وطني العربي أصبح أصغر  
وطني  
وطني يامالك حبك قلبي

وطني ياسبب حيرتي وغلبي  
كنت كبير وكنا بنحلم  
ييجي اليوم ونشوفك أكبر  
وطني

فين أحلامنا وفين أمانينا  
فين إرادتنا إلهي تقويننا  
فين وحدتنا إلهي تخليننا  
أقوي شعوب ف الدنيا وأكثر  
أصبح كل الشعب العربي  
ملطشه تضرب فيه اعدينا  
شرقي بيضرب وكمات غربي  
وكل الدنيا بتضرب فينا  
ومفيش حد يبكي علينا  
ولا يوم حد جه يواسينا  
وسيبنا دينا وقاعدين نسكر  
وطني

كل الشعب العربي يبكي  
وكل أطفاله بتبكي معاه  
لما يشوفوا دموع ف عينينا  
شافوا الحسره وشافوا الآه  
حتي دموعنا عشان نمسحها  
ما حدش فينا ممكن يقدر  
وطني

وطني يا هادم لا انتصاراتك.  
وطني يا مضيع كل حياتك  
يا إما بتجري ورا الخائنين  
يا إما بتمشي ورا شهواتك  
فين الوحده إلی تخليك  
عايش حر وسيد ذاتك  
وحدة كل الشعب العربي.

وطني  
كلمه كنا نقولها زمان  
شعبنا صامد للطغيان  
ياريت أيا منا ما جات  
ولا كان ونشوف فيها وطننا الأكبر  
يوم ورا يوم امجاده بتصغر

# سینا

سینا هیا الحب كله  
سینا هیا الخير وضله  
سینا هیا قلب فینا  
سینا منها نور عینینا  
كل حبة رمل فیها  
لیها عندي ألف ذكری  
علیها اسم جندي لینا  
راح وضحي لأجل بکره  
بکره تمر سنین علیها  
ونجني منها أحلي فکرة  
فیها بکره نشوف مصانع  
فیها بکره نشوف مداين  
تلاقي كنيسه جنب جامع  
فیها فاکهه م الجنائين  
ياما جنودنا ضحوا لیها  
وطهروها من كل خاين  
بکره نشوف هناك ولادنا  
يصنعوا الفرح الجميل

و نلاقي ولاد ولادنا  
بيحققوا المستحيل  
بكره نغنوا فوق ترابها  
ليها أحلي مواويل  
بكره نغنوا فوق ترابها  
ليها أحلي مواويل

# المصريين

المصريين شعب طيب  
مليان تقوي وإيمان  
كريم وأصله طيب  
وف مصر تلاقي الأمان

والناس مهمومه وحزينه  
م الغلا والهـم راكب  
يارب تمشي السفينه  
ولا تنام قلوب المراكب

زادهم خير بلادهم  
جاي من إيدك وايدي  
يارب كتر أعيادهم  
لأجل ولدي وحفيدي

يانور الهدى يا هادي  
كن لنا شفيع  
ويارب تحفظ بلادى  
واحميها بسد منيع



## نتحمل شويه

الناس مهمومه وحزينه  
م الغلا والههم راكب  
يارب تمشي السفينه  
ولا تنام قلوب المراكب  
وتهدي الحكومه الرشيده  
وترحمي شعبك شويه  
حمال مصاعب عديده  
وما عاد متحمل اسيه  
وترحم الناس الغلابه  
وتطبق شئ م العداله  
الشعب هايموت م الكأبه  
وياريت تفيد القواله  
يابلدي أنا بحبك  
وماخاف لوم العوازل  
ومهما يقسي قلبك  
ثورة تاني ما نازل  
كفاية إلي شوفته مره

من غدر ومن خراب  
حياتنا هاتبقي مره  
لو ما تحملنا الصعاب  
اتحمل يا صاحبي وعيش  
بدل ما ييجوا الدواعش  
ساعتها هتقول معيش  
وياريتني ماكنت عايش

# أحمد ومينا

أحمد أذان ومينا الجرس  
دولت خوات وراكبين فرس  
حاملين سلاحهم يحموا بلادهم  
بكل شجاعه من عدو نجس  
شافهم عداهم خاف من أذاهم  
قام واتخرس  
ألقوا السلام وادوا التمام  
وقالوا بسلام فداكي ياسينا  
فداكي شبابك هانحي ترابك  
من كل إلهي عابك بقلوبنا وعينينا  
ولا يوم هانركع ولا حتي نرجع  
إلا ما نمنع عدوك ياسينا  
لا يدنس ترابك ويمنع شبابك  
إنه يزرع ترابك وده عهد علينا  
اقسمنا بشبابك لنظهر ترابك  
بدم اخواتنا أحمد ومينا  
أحمد أذان ومينا الجرس  
دولت خوات وراكبين فرس

# الضرايب

الشعب صار ع الحديده  
م الضرايب والرسوم  
كل يوم ضريبة جديدة  
تزود علي الناس الهموم  
وسايبين ليه الحرامي  
وظالمين إللي مش لاقى هدوم  
الشعب مش ناقص بلاوي  
كفاية بلاوي الحكومة  
مسكين محتاج يداوي  
بلاويه وبلاوي الحكومة  
ياحكومة خفي عليه  
وارحمي شعبك شوية  
وكفاية تقسي عليه  
الشعب داب م الأسية  
لما قولتوا يانور عينينا  
كنتوا السبب في سرورنا  
لقينا الخير إللي ف أيدينا

بيطير ويروح لغيرنا  
ياحكومة حرام عليكي  
اتقي الله ف شعبك  
لو يوم يدعي عليكي  
حسابكم هيكون لربك

## إيه يا عم كرشه

إيه يا عم كرشة دا إلي طالع من لسانك  
كفاية علينا ريحتك إلي غطت علي جنانك  
ما تقول كلمة حلوة سمعنا مرة غنوة  
كلمة عطف مرة عبر فيها عن حنانك  
ولا إنت بس شاطر ع الغلابة تسن سنانك  
ليه تفرض ضرايب علي الناس المطحونين  
وإنت أموال غلابة جوة كرشك مدفونين  
قدامك لحمة يامة وسايب شعبك محرومين  
مش لاقى حتي لقمة متغمسة بفرختين  
إيه يا عم كرشة ما تخف علينا حبة  
خف تزيد محبة لو ترضي المساكين  
ونشوف الخير كتير علي قدوم الواردين  
ليه تفرض ضرايب ع القديم وع الجديد  
واعيش ف بيتي عايب وكأنه قانون جديد  
فين استثماراتك إلي قولت من سنين  
وهاتشغل ناس غلابه يتعدوا بملايين

وها تصلح أرض ياما بملايين الفدادين  
فين إنتاج بلدنا من الغاز والبنزين  
فين دخل القناة قول وديته فين؟  
حق شعب بلدي لازم يرجع بالتمام  
لاجل شعب بلدي كله ينعم في سلام  
ونطبق القانون ع الكبير بدون كلام  
لا فرق بين كبير ولا شخص م العوام  
كله ياخذ حقه بالكمال وبالتمام  
ساعتها تبقي جنة وما يكون عليك ملام  
فين ياعم كرشة فين ياعم كرشه  
رد وليك سلام

## إبن البلد

أنا العريان و غيري متغطي بهدومي  
أنا الأحزان علي كتافي مع همومي  
أنا إلي متاكل عضمي من يومي  
أنا إلي راضي بحظي ومقسومي  
أنا إلي باعجن أنا إلي باخبز  
و غيري يبجي ياكلها  
وهو جالس علي مكتب  
من غير ما يعرف تفاصيلها  
أنا إلي باعرق أنا إلي باتعب  
أنا إلي باديلها  
من عزمي ومن قوتي  
عشان تنور قناديلها  
أنا إلي اوهبها نور عيني  
لو تطلب بدون حتي مأسالها  
أنا الهيمان في تلابيبها  
أنا الحيران في سراديبها



أنا إليّ يعز عليه نفسه  
لما الاقيني من الاعيبها  
أنا إليّ شربت من نيلك  
أنا إليّ أكلت من طينك  
وجه اكتب طلبتيني  
رسمت البسمه علي جبينك  
وظهرت سماكي مع أرضك  
من كلاب عدوينك  
سيبتيني ليه يامه؟  
قوليلي إيه يامه  
أنا ديني من دينك  
أنا العابد في محرابك  
أنا الناسك في اعتابك  
أنا المكتوب علي جبينه  
روحه فدا ترابك  
أنا إليّ ماشي جنب الحيط ومتداري  
لا حد شافني ولا حد حس أفكارني  
أنا مش عايز من الدنيا  
غير اللقمه مع الهدمة  
وغرفة تسترني أنا وعيالي في الضلمة  
أنا لا عمري شوفت مارينا  
ولا سمعت عن خليج نعمة  
ولا عمري اشتكيت من برد

أو حر أو زحمة  
أنا إلي تمر عليا الشهور  
من غير ما ادوق اللحمه  
أنا لا أعرف نخبة ولا نشطاء ولا سبوبة  
أنا كل إلي عايضة  
إني افوق من الغيوبه  
أنا إلي فلحت الأرض وزرعت اشجارها  
وبدمي رويتها ونا إلي نورت ازهارها  
أنا إلي ما حدش فكر يوم يشكرني  
ولا الدوله قالت يوم تقدرني  
أنا إلي نايم علي سريري ونا خايف  
علي صحتي وعلي عيني إلي بيها مش شايف  
وعلي رزق يومي إلي أمتي يبجي مش عارف  
أنا ليه كل الدنيا مش شايفاني  
مع إني شايف حاجات كتير غايطاني  
ولو نطقت واتكلمت يقطعوا لساني  
أنا المغدور بيا ونا الجاني  
أنا إلي الدمع ف عينيا  
محبوس ف اجفاني  
أنا إلي ما حد يسمعلي  
حتي لو قولت آه ياني  
أنا الفاعل وأنا المفعول في كل مكان تلاقيني  
ولما الباشا يحتاجني يقولي تعالي غذي

ولما يقضي مصلحته في أقرب بير ويرميني  
أنا الظالم ونا المظلوم من أيام فراعيني  
وصابر ع الأسي دايمًا وف قلبي نار بتكوينني  
أنا الفلاح أنا العامل أنا الصانع  
أنا إلي باصلي كل فروضي ف الجامع  
وكل إلي ييجي من ربي أنا قانع  
أنا إلي سمعت لطوب الارض والكل مش سامع

## من سيجال عن الإرهاب

ياللي إنت نايم ف العسل  
وفاكر إيمانك ده إيمان  
رايح تقتل واد بطل  
واقف يحرس ف الميدان  
بيحمي تراب بلادنا  
عليك اللعنه يا شيطان  
حرمت العريس من فرحته  
وقتلته ليه يوم دخلته  
للجنه عارف سكته  
وإنت ف جهنم تتكوي  
وهو سعيد في جنته  
يابايع أهلك وناسك  
كونت فكرك من أي دين  
امتي يوم تعرف خلاصك  
وتتوب ف يوم وتكون حزين  
ربك أمرنا في كتابه  
إنك تجير المشركين  
إزاي عقلك يقولك أقتل  
فينا إحنا يامسلمين

# عيش حمار

## مع الاعتذار للحمار

عيش حمار  
تعيش مستور  
وبلسان طويل  
هتبات مغدور  
عيش ف الضلمه  
وبلاش النور  
عشان ف العتمه  
ما تكون شايف  
أثر الظلمه وراية الجور  
دا حنا عبيد  
وهما سيادنا  
من أيام  
الإله حتحور  
دانت ف آخر الصف يا صاحبي  
وفيه قدامك مليون سور  
اوعي ف يوم تلعب بديلك  
تفكر مره تنط السور  
ألا هاتقع علي رجليك

ويقولوا عليك دا واد مغرور  
 ياالله ننهق سوي يا خوانا  
 لما ييجي علينا الدور  
 حتي لو حبيننا ننهق  
 لازم قبله نقول دستور  
 ولازم إحنا نشيل الحمل  
 لاجل البيه يكون مسرور  
 وإياك تشكي ولا تنن  
 ولا تقول إنك معذور  
 ولا تتألم ولا تتضايق  
 ولا تقول عايز دكتور  
 هتلاقي نفسك والله ياصاحبي  
 حنة لحمه ف قلب ماجور  
 وخليك ماشي مركوب أحسن  
 ما تموت لحظه ف يوم مغدور  
 وهز ديلك ويا ودانك  
 وافرح ألا تموت مقهور  
 عيش حمار تعيش مستور



# نسونها

نسونها ياعم نسونها  
خلي الستات تفرح فينا  
وكل محافظة علي دينها  
والشعب بتاعنا عايز دينا  
ياريت تلبي مطالبهم  
وما تفرح أعدائنا فينا  
خلي الشعب يتهني  
ويغنوا أحلي أغانيها  
والكل يغني ويطبل  
ونرقص سوا مع دينا  
وننسي الدنيا وهمومها  
ونبات سكران زي الطينة  
ولا نلقي واحد مكشر  
ولا ست قاعدة وحزينة  
الست تمام زي الراجل  
ومفيش خلاف مع بعضينا  
ولما نشوفها قدامنا

نتحمل كل بلاوينا  
ونظرة منها لو راضية  
تحلو الدنيا ف عينينا  
رجالة هاتقعد ف بيوتها  
تطبخ وتخبز في عجينة  
والست هاتمسك مجدافها  
وتصبح قائد لسفينة  
خمسة وخميسة ياخوانا  
في عين إلهي يحسد فينا  
وخلي الأمم المتحدة  
والعالم كله يهنيينا  
علشان الست بقت راجل  
وكانت فلة وياسميننا  
ولما تشوفها الرجالة  
هاتقولها حاضر يا أخينا



## في مصر قامت ثورتين

في مصر قامت ثورتين  
ولسه برضه علي حالها  
شايلها برمش العين  
وقلبي قال يا جمالها  
شبابها قال كلمتين  
كان نفسه يوم يعدلها  
حرية وكرامة إنسانية  
ولقمة خبز لعيالها  
ومعها عدالة اجتماعية  
تدوم وتعيش لأجيالها  
كان نفسه ينهض ببلده  
ويحقق كل آمالها  
لكن لحد أمتي  
هانفضل نبكي على حالها  
وامتي هاييجي اليوم  
نغني ليها موالها  
موال الصبر طال عمره  
وموال الفرح يحلالها

قولوا حققنا إيه  
وشوفوا إيه إلهي جرالها  
لا حرية عادت موجودة  
والكلمة لازم بحساب  
والكرامة صارت مفقودة  
واللقمة تيجي بعذاب  
والعدالة أنتم عارفينها  
متروكة لرب الأرباب  
إيه إلهي اخدنا م الثورة  
ردوا عليا يا شباب  
غير بس قومنا وحاربنا  
في كل حته الإرهاب  
لازم نراجع حساباتنا  
ونعرف إيه الأسباب  
لأجل شبابنا يتعلم  
وكل خطوة بحساب  
ياتري باتكلم صح  
ولا هاسمع لوم وعتاب

## يا أمير كفر الديابه

يا أمير كفر الديابه  
لم ديابك عننا  
داحنا ناس غلابه  
والغدر مش طبعنا  
طبعنا كله طيابه  
ومالناش غير ربنا  
عايزين عيش بكرامه  
ولا حد يذلنا  
السيوف علي رقابنا  
ومفيش سلاح عندنا  
غير دعوة المظلوم  
ع الظالم لربنا  
هو الحكم العدل  
وحافظ لحقنا  
يا أمير كفر الديابه  
الأمر صار خطير  
وإحنا ناس غلابه

وانت ديب كبير  
ياريت تلم ديابك  
وتحطهم ف بير  
يا أمير كفر الغلابه  
الرعيه بتستجير  
خد بالك م الرعيه  
وخليك فعلا أمير  
يا تشيل المسئوليه  
يا كفايه عليك شخير  
يا أمير كفر الغلابه

# صاحبي إلهي غاوي


صاحبي إلهي غاوي  
دايما شكاوي  
ويحكي حكاوي  
ويكذب كثير  
ويقسم يمين  
بملة ودين  
إنه حزين  
ع الشعب الفقير  
جابوا إلهي جابوا  
وسابوا إلهي سابوا  
وهو وشبابوا  
خلوه وزير  
يؤمر ويسمع  
وكل يوم يطلع  
علينا ويرجع  
بمشروع كبير

ولا يوم فلحنا  
وشايلين جراحنا  
ومن يومها وإحنا  
فلوسنا تطير  
طب نعمل إيه  
بعد الجنيه  
ما راحت عليه  
ودفناه ف بير  
ونشكي لمين  
ونقول يامين  
وهو الأمين  
علينا وكبير

## شاغلني هواك

شاغلني هواك يا جميل ومخلي  
حلوه معاك الدنيا تملي  
شاغلني شاغلني شاغلني هواك  
ولما تغيب أنا باستناك  
بشوق وحنين  
وعذاب وأنين  
ولما ألقاك أفرح بلقائك  
ولما قلبي يلمح طيفك  
يقول السعد جه وياك  
شاغلني شاغلني شاغلني هواك  
ليه تعاندني  
وتبعد عني  
وانت خيالك جوه النني  
قرب مني يا الله ياروحي  
قربك مني بيطمني  
ليه تهجرني وتعذبني

لو حببت خد قلبي معاك  
شاغلني شاغلني شاغلني هواك  
وريح بالي وريح بالك  
قرب مني إيه إلهي جراك  
قلبي ياروحي مشتاق لدلاك  
ولا الشوق دايمًا يحلاك؟  
شاغلني شاغلني شاغلني هواك





# يقول الناس

يقول الناس عنك  
ويقول الناس عني  
حديث لا يليق  
يوئلك ويؤلمني  
يحسدون الحب فينا  
رغم ما تخفيه عيني  
فلا تخشي أحدا يلوم  
وزودي ف الحب عني  
وقولي إني أحبك  
وروحي فيك وأنت مني  
وارسلي النسمات تسري  
بالحب بينك وبينني

## الحبيب الغائب

رسائل الحب تأتي من حبيب لا أراه  
بعيد عن العين لكن في القلب سكناه  
تمر بنا الأيام دوما يزداد شوقي للقياء  
ولكن العمر يجري ولا ندري متي نلقاه  
فمتي يكون اللقيا لننهل شهد الحب وياه  
عشقت كثيرا ولكنه مالي عشق سواه  
تراه عيني ويراه قلبي ولا يروا إلا هو  
فياربي رضاك عني هو كل ما أتمناه  
ويعود لي حبيب غائب يرعاني وأرعاه  
فكن لي يارب عونا علي البعد حتي ألقاه

## شوفت الجمال ألوان

شوفت الجمال ألوان  
وما شوفت جمال زي ده  
ما اقدرش غير إني أقول  
سبحانه من عمل كده  
لو المخبي بيان  
و عندي جمال زي ده  
هامسح الأحزان  
وأكيد كل العدا  
يازهرة في بستان  
متلونه بألوان  
طبيعيه م الرحمن  
حني علي الغلبان  
ولو بنظرة رضا  
لو كان نصيبي كده  
كان قلبي زمانه رضي  
وأعيش سعادته وهنا  
وف عز وف بغدده  
إلي خلف ها الجمال  
يستحق نبوس ايديه

شوقت ياما كثير جمال  
وما شوقت جمال عينيه  
والشعر الحرير وسايح  
والشفاف وردى ليه  
لو هابيع عمري كله  
مستعد أطلب ايديه  
حد ياناس يقول لابوها  
إني شاري بمليون جنيه  
ولو يوافق تحت أمره  
ومش كثير ياناس عليه



## قمر الليل

لما نور الفجر يسطع  
وليلي حابر من ظنونك  
وألقي نجوم الليل بتضحك  
والقمر داعب جفونك  
ولما ادوق الشهد منك  
من خدودك من عيونك  
ولما أسمع غنوه منك  
تقولي حبي زاد جنونك  
أحلف ياروحي إنني ما أقدر  
أعيش حياتي يوم بدونك  
لما أشوف السحر منك  
جاي لعندي والدلال  
ولما شعاع الحسن صابني  
جوه قلبي والجمال  
ولما أشوف نوره زايد  
بعينيا ولا ف الخيال  
اقول لروحي خلاص ياروحي

سلمات ليكي وقلبي مال  
خلاص ملكتي كل قلبي  
وحبي ليكي مالوش مثال  
ولو هجرتي او نسييتي  
نسياني ليكي دا شئ محال  
دا شئ محال

## مش مسامحه

مش معني إني ساكته  
إني راضيه باللي بيا  
سكوتي يمكن يكون  
نيران بتغلي فيا  
كتير آسييه فانت  
وكتير قسيت عليا  
كل مره كنت اسامح  
كنت تزيد ف الأسيه  
ليه يابو قلب جارح  
ما رحمت دموع عينيا  
أنا قلبي مش مسامح  
لو حتي تبوس إيديا

# أشكي لمين ؟!

اشكي لمين جرح الهوي  
ياللي نسيني  
نظرة عينيك سحر ودوا  
لشوقي وأنيني  
مرت سنين توب الهوي  
لابس يقيني  
والقلب كان رغم الجوي  
بيقول شاريني  
ما كنت فاكرك إنك ف يوم  
هاتبيعيني

اشكي لمين جرح الهوي  
ياللي نسيني ف الغرام  
نظرة عينيك سحر ودوا  
لشوقي وأنيني بدون كلام  
مرت سنين توب الهوي  
لابس يقيني بالتمام  
وقلبي كان رغم الجوي



بيقول شاريكي وبسلام  
ما كنت فاكّر إنك ف يوم  
هاتبيني ويدوم خصام



# لحظة ندم

كنت فين يا قلبي فين  
سيبت طيرك ليه يهاجر  
وبدال ما تمسح دمع عين  
كنت ليه يا قلبي غادر  
من ظلمي ليه وغدري بيه  
راح سايبني وراح مسافر  
لو رق قلبك يوم لحبك  
ما كنت يوم تقولي فاكر؟  
إنت ليه يا قلبي ليه؟  
بيعت حبك وكنت قادر  
ليه نسيت وع الشوك مشيت  
ولحب عمرك كنت ناكر  
من صنع ايديك جنيت عليك  
ورجعت تندم ع إلهي صاير  
أنا بالوم قلبي ليه؟  
مش قادر أنسي دموع عينيه

ومد ايدة بوردة حمرا  
حمرا وردي بلون عينية  
وشوفت منه أحلي بسمه  
رغم حزنه واتعجبت ليه  
كان فاكرنى إني هاقدر  
أحن تاني وارجع إليه  
لكن ياقلبي طلعت قاسي  
قاسي والله كثير عليه  
قاسي والله كثير عليه

# فَاكِر

## ( أَغْنِيَة )

فاكر لما كنت جنبك  
وقلبي كان بيضم قلبك  
قسيت عليا وبيعت حبك  
وجاي تاني تقولي فاكر  
أنا خلاص يانور عينيا  
كسرت قيدي إلكي بايديا  
وأصبحت حرة من غرامك  
وخلص هاتوب م الأسية  
لا تقولي فاكر ولا أنا فاكرة  
خلص غرامك عندي ذكري  
ولما تيجي تاني بكرة  
هاقولك إنت إلكي كنت غادر  
فاكر لما كنت جنبك  
وقلبي كان بيضم قلبك  
وردة كانت بين إيديك

وعبيرها كان مالي عينيك  
وسيبقتها وراحت عليك  
وقطفها خل وراح مسافر  
جاي بعد العمر كله  
جاي ثاني.!! لسه فاكّر  
فاكّر لما كنت جنبك

# ورد الهوي مال

ورد الهوي مال  
عليا وعلي قلبي  
وسألني كام سؤال  
عن حبي المستخبي  
حبك لسه عايش؟  
ولا هاتنكر حبي  
وترجع بعد زمان  
تقولي إيه ذنبي؟  
رد عليها وقال  
ورد الهوي مال  
عمري ما قدر اخالفك  
ولا عمري أنسي عواطفك  
ولا أقدر أنسي شفايفك  
جمعتنا ف ليلة بمبي  
ورد الهوي مال  
عليا وعلي قلبي  
قلبي بيفرح بيكي

لما يطل عليكي  
ويشوف صورته ف عينيكي  
وتيجي تحضن قلبي  
ورد الهوي مال  
عليا وعلي قلبي



# تبيع الود

تبيع ودك وتنساني  
يا ساكن قلبي والنني  
وف بعدك قلبي بيعاني  
واشتاقلك و لو قريب مني  
وأشوف صدك أعيش تاني  
لحظات شوق تجنني  
ويطير عقلي ووجداني  
لو شهديك يوم بتحرمني  
ليه الأسيه من طبعك  
ما تردي عليا وتحني  
دي لحظة بعد عن ضيك  
بيغيب الضيا عن عيني



## إنت ليه؟

إنت ليه قلقت حبك  
وليه شغلت بالها  
كفاية إلی هي فيه  
وكفاية إلی جرالها  
قولت افضفض شوية  
واحكي ليها واسألها  
فهي إلی باقية ليا  
ونا ليها ابقالها  
قالت كلام جميل  
ووصفتلي أحوالها  
رد عليها قلبي  
بعد ما داب في جمالها  
حطي همك علي همي  
في كفة واحدة بنشيلها  
ونام القلب وارتاح  
بعد ما حس أقوالها  
وشافوا الدنيا براح  
وحقق ليها آمالها



## علي إيه بتعتب ف كلامك

علي إيه بتعتب ف كلامك. . يا حبيب العمر  
إنت إيلي بدأت بخصامك. وسقتني المر  
علي إيه بتعتب ف كلامك

نسيت أيامي وإيامك. أيام ما كنا حلوين  
عصافير بتغني لبعضيها. وع العشره متعاهدين  
علي إيه بتعتب ف كلامك

وبنينا العش لوحدينا وأصبح فيه عصافير لينا  
وربك بكرمه وفضله كانت ايده ف ايدينا  
علي إيه بتعتب ف كلامك  
وقسمنا اللقمه والملحه. ودوقنا الحزن والفرحه  
وزرعنا الحب ف اراضيها وأشجار الود كانت طارحه  
علي إيه بتعتب ف كلامك

عيب ما تزود في خصامك. خليك عاقل ف كلامك  
هاتحلي أيامي وإيامك ونا شاري ودك وغرامك  
علي إيه تعتب ف كلامك

لا تزود حزني واحزانك. يا حبيب العمر  
ولا تسمع تاني لشيطانك وتنسي الغدر  
يارب يسعد أيامك. ونعيشوا ف ستر  
علي إيه بتعتب ف كلامك

أيامنا بسرعه بتعدي وما حدش بيقول لها هدي  
ماشيه شئنا وإبيننا. يبقي نعيشها لبعضينا  
ولا يوم تعتب ف كلامك يا حبيب العمر

## ليه يا جميل

ليه يا جميل تتقل علينا  
وتخلي قلوبنا مشغولة بيك  
وتعدي علينا ما تسأل فينا  
ولما تشوفنا تزوغ بعينيك  
وعمال تتقل والله علينا  
ولا بتسأل ف إلهي شاريك  
وطيفك لما يهل علينا  
تشوف فرحتنا كمان بعينيك  
وأحيا ف جنة أنا في وجودك  
وألقي الدنيا منورة بيك  
وزهر قلوبنا كمان بيفتح

لما يحس بلمس إيديك  
ترجع تاني تنسي عهدك  
وما صدقت إني ألاقك  
ومهما إليك مدينا أيدينا  
تعمل ناسي وأعيش أحزاني  
ومهما تقسي يا روجي علينا  
مش هانسك مهما تنساني

## السيرة الذاتية للشاعر



من مواليد محافظة المنوفية

تربي وعاش بمدينة دمنهور محافظة البحيرة

استشاري أطفال وحديثي الولادة بدمنهور

## محتوى الكتاب

2	بطاقة الكتاب
3	الإهداء
4	الطب دا مهنتى
5	أنا ساحر
6	صعب جدا
7	صباح التفاؤل
8	أنا روح عايشه فى إنسان
10	قلمى سيف
11	دمنهوور بلدى
14	فاكر
15	صعبة الدنيا
16	كنت زمان
19	كنتى فين
20	يادنيا خفى الوجع
22	صورة طفل حزين
23	باحلم
24	معانا طبيب منفوخ
25	إوعى
27	معقولة
29	الأصل مش بالمال
30	بطل تضحك على نفسك
33	وزيرة الصحة
34	الدوا نشيد تهديه



35	بحر الوجد
36	القسم الجديد
37	عتاب الندل
38	الصاحب الزين
39	الجوع كافر
40	حبسوك ياشط إسكندرية
42	حكاية علاء
46	حوار النعجة والخروف
48	عجبي
50	مذكرات سكران
53	غلطان إल्ली يحب وي
54	أنا جاي أتأهل ياخوانا
56	حكاية وطن
59	وطنى حيببى
62	سينا
64	المصريين
65	نتحمل شويه
67	أحمد ومينا
68	الضرايب
70	إيه ياعم كرشه
72	ابن البلد
76	من سجال عن الإرهاب
77	عيش حمار
79	نسونها
81	فى مصر قامت ثورتين
83	يا أمير كفر الديابة

85	صاحبى إالى غاوى .....
87	شاغلنى هواك .....
89	يقول الناس .....
90	الحبيب الغايب .....
91	شوفت الجمال ألوان .....
93	قمر الليل .....
95	مش مسامحه .....
96	أشكى لمين .....
98	لحظة ندم .....
100	فاكر ( أغنية ) .....
102	ورد الهوى مال .....
104	تبيع الود .....
105	إنت ليه .....
107	على إيه بتعتب فى كلامك .....
109	ليه ياجميل .....
111	السيرة الذاتية للشاعر .....
112	محتوى الكتاب .....